

इवनिंग डोगरी न्यूज़ बुलेटिन

समे .18:15 Hrs

<><><><><><>

Headlines

1. केंद्रीय मंत्रिमंडल ने इलाकाई संपर्क योजना - संशोधित उड़ान योजना गी ब'रे 2026-27 थमां ब'रे 2035-36 तगर 10एं ब'रें दी अवधि लेई 28 ज्हार 840 करोड़ रुपें दे कुल खर्चे कन्नै शुरू ते लागू करने दी मंजूरी देई दिती ऐ।
2. लेफ्टिनेंट गवर्नर मनोज सिन्हा होरें इंडियन सोसायटी फॉर ट्रेनिंग एंड डेवेलपमेंट दे जम्मू चैप्टर दा उद्घाटन कीता। उ'नें आखेआ जे इस पैहलकदमी दा मकसद जम्मू गी पेशेवर सिखलाई दे इक गढ़ दे तौर पर स्थापत करना ऐ।
3. एलपीजी रीफिल बुकिंग दे नियमें च कोई बदलाव नेई कीता गेआ ऐ। मंत्री जावेद अहमद डार होरें लोकें गी जम्मू-कश्मीर च एलजीपी दी सुद्दी सप्लाई दा भरोसा दोआया ऐ।
4. जम्मू दे सबनें शा बड्डे सन्नासर घाटी आहले ट्यूलिप गार्डन गी अज्जै थमां आम लोकें लेई खोली दिता गेआ ऐ।
5. मौसम विभाग ने कल 26 मार्च थमां अगगे जम्मू-कश्मीर दे मैदानी इलाकें च बरखा ते उच्चिएं धारें पर बर्फबारी दे असार जताए न।

<><><><><><>

Cabinet

केंद्रीय मंत्रिमंडल ने अज्ज इलाकाई संपर्क योजना - संशोधित उड़ान योजना गी ब'रे 2026-27 थमां ब'रे 2035-36 तगर 10एं ब'रें दी अवधि लेई 28 ज्हार 840 करोड़ रुपें दे कुल खर्चे कन्नै शुरू ते लागू करने दी

मंजूरी देई दित्ती ऐ। नमीं दिल्ली च मंत्रिमंडल दी बैठक दे बाद मीडिया गी जानकारी दिंदे होई सूचना ते प्रसारण मंत्री अश्विनी वैष्णव होरें दस्सेआ जे इलाकाई संपर्क गी बढ़ावा देने लेई ऐसी थाहें पर 100 ब्हाई अड्डें दा विकास कीता जाह्ग, जित्थे अजे तगर ब्हाई पट्टियां नेई हैन। एह्दे'नै घट्ट सेवा आहले ते मते पच्छेत्रे इलाकें च इलाकाई ब्हाई संपर्क च सुधार होगा।

<><><><><><>

LG-ISTD

लेफ्टिनेंट गवर्नर मनोज सिन्हा होरें खित्ते च सिक्खने ते विकास सरबंधी तंत्र गी तगड़ा बनाने दी दिशा च इक महत्वपूर्ण गैहू दे तैहत सिखलाई ते विकास सरबंधी इंडियन सोसायटी फॉर ट्रेनिंग एण्ड डिवेलपमेंट दे जम्मू चैप्टर दा अज्ज उद्घाटन कीता। इस पैहलकदमी दा मकसद जम्मू गी पेशेवराना सिखलाई दे इक गढ़ दे तौर पर स्थापित करना ऐ। इस मौके पर किट्ट अग्गे भाशण दिंदे होई एल.जी होरें सरबंधत लोकें ते संस्थानें गी सशक्त बनाने दी जरूरतै पर जोर दित्ता तां जे नमीं उभरा'रदी चुनौतिएं दा सामना कीता जाई सकै। सिन्हा होरें युनिवर्सिटीएं ते संगठनं गी गुजारश कीती जे ओहू आई.एस.टी.डी सोसायटी कन्नै जुडन ते भारत गी इक अगुआ राश्ट्र बनाने दे सुखने गी सच करने आली भेठा अपना जोगदान देन।

<><><><><><>

LPG-Rumours

एल.पी.जी गी लेइयै सोशल मीडिया पर चला करदी रिपोर्टें दे मद्देनजर सरबंधत अधिकारिएं साफ कीता ऐ जे मुख्य भरे च एल.पी.जी रिफिल बुकिंग दे नियमें च कोई बदलाव नेई कीता गेआ ऐ। मजूदा दिशा-निर्देशें मूजब शैहरी इलाकें च इक बुकिंग दे 25एं दिनें दे बाद गै दुआ सलेंडर बुक होग ते ग्रामीण इलाकें च एहू समें-सीमा 45 दिनें दी ऐ। अधिकारिएं लोकें गी गुजारिश कीती ऐ जे ओहू घाबबरन नेई ते नां गै काहली-काहली च एल.पी.जी बुकिंग करारना शुरू करी देन कीजे एलपीजी दा सुद्दा भंडार उपलब्ध ऐ। बसनीकें गी सलाहू दित्ती गेई ऐ जे ओहू एलपीजी सेवाएं ते एह्दी उपलब्धता दे सरबंधे च अधिकारिक जानकारी पर गै भरोसा करना तोआई, मंत्री जावेद अहमद डार होरें लोकें गी जकीन दोआया ऐ जे जम्मू-कश्मीर च एलपीजी जां होरनें जरूरी चीजें-बस्तें दा कोई त्रोज़ा नेई ऐ।



Ram-Rasoi

लोडमंद परोआरें दी मदाद ते साधनें-स्रोतें दे जिम्मेदारी कन्नै इस्तेमाल गी बढ़ावा देने दे मकसद कन्नै इक मकामी एन.जी.ओ आसेआ जम्मू दे सैनिक कलोनी इलाके च 'राम रसोई' नांऽ कन्नै सामुदायिक रसोई आली इक अनोखी पैहल कीती गई ऐ। इस प्रोग्राम दे तैहत रूट्टी पकाने लेई रिवायती चुल्हें दा इस्तेमाल कीता जंदा ऐ तां जे एल.पी.जी पर निर्भरता घट्ट होऐ ते एहदे समझदारी कन्नै इस्तेमाल गी बढ़ावा देने लेई लोकें अंदर जागरूकता पैदा कीती जाई सकै। मकामी बसनीकें इस अनोखी पैहल दी सराहना करदे होई इसी चुनौतिएं भरोचे समें दरान सेवा, समाजी सद्भाव ते सांझी जिम्मेदारी करार दित्ता ऐ।



NCB

नशे दी तस्करी पर पूरी चाल्ली रोक लाने दी इक बड्डी कोशश दे तैहत जम्मू-कश्मीर ते लद्दाख केंद्र शासत प्रदेशें लेई सांझी तालमेल कमेटी दी तिमाही बैठक दा आयोजन जम्मू आले बीएसएफ फ्रंटियर हैडक्वार्टर च हाईब्रिड 'हंगु' नै कीता गेआ। नार्कोटिक्स कंट्रोल ब्यूरो-एन.सी.बी आसेआ लाई गेदी इस बैठक दरान बक्ख-बक्ख एजेंसिएं बश्कार तालमेल तगड़ा बनाने बक्खी चेचा ध्यान दित्ता गेआ। बैठक दरान जेहडे मुख मामलें पर चर्चा कीती गई उं'दे च ड्रोन राहें होने आली तस्करी, पंजाब कन्नै जुडे दे तार, जम्मू-कश्मीर च सरगर्म 10 बड्डे गिरोहें दी शिनाख्त, हवाला आपरेटरें दा पता लाने, नशे दे मते कारोबार आले इलाकें दी पंछान करने ते प्रदेशें च संदिग्ध माली लैन-देन पर तक्क रखने सरबंधी मामले मुखतौर पर शामिल हे।



Sanasar Tulip Garden

जम्मू दा पैहला ते सबने शा बड्डा ट्यूलिप गार्डन जेड़ा रामबन जिले दी सनासर घाटी च ऐ, उसी सैलसफा च बढ़ावा देने आस्तै अज्ज खोल्ली दित्ता गेआ ऐ। स्हाडे जिला संवाददाता हुंदी रिपोर्ट मुजब 35 कनाल च बने दे इस ट्यूलिप गार्डन च 25एं किस्में दे 2 लक्ख थमां बी मते फुल्ल लग्गे दे न। एहदा उद्घाटन रामबन थमां

विधायक अर्जुन सिंह राजू हों कीता। इस गार्डन च पर्यटक ट्यूलिप दे अलावा नर्सिंग, गुलाब ते जलकुंबी समेत होंरनें फुल्लें दा बी आनंद लेई सकदे न।

<><><><><><>

Dy.CM

उपमुखमंत्री सुरिंद्र चौधरी होंरनें आखेआ ऐ जे सरकारै जम्मू-कश्मीर च शिक्षा ते रोजगार बश्कार बित्थ गी पुरने लेई मिशन स्किल दे तैहत इक महत्वकांक्षी पैहलकदमी रम्भी ऐ। एहू गल्ल उ'नें जम्मू दे कन्वेंशन सेंटर च सरबंधत धडें दी उच्च स्तरी कार्यशला गी संबोधित करदे होई आखी। इस मौके पर उ'नें गलाया जे सबनें गी सरकारी नौकरियां नेई दित्ती जाई सकदिआं, इस करियै कौशल आधारित औद्योगिक सिखलाई अत्त लाजमी होई जंदी ऐ। इस प्रोग्राम दे तैहत स्कूली स्तर थमां गै कौशल विकास आली शिक्षा पर बल दित्ता जाहग तां जे रोजगार ते उद्योगें गी तगड़ा बनाया जाई सकै।

<><><><><><>

Community Radio Doda

सामुदायिक पुज्ज गी होंर मजबूत करने आस्तै डोडा जिले च इक गैहू पुट्टी गेई ऐ जेदे च कम्युनिटी रेडियो डोडा 88.8 एफ.एम गी लांच कीता गेआ ऐ। इस स्टेशन दा उद्घाटन उत्थूं दे डिप्टी कमिशनर कृष्ण लाल होंरनें भारती सेना दी मदाद कन्नै कीता। इस कम्युनिटी रेडियो दा मकसद लोकें दा आपसी तालमेल बदाना, मकामी संस्कृति गी बढावा देना ते प्रशासन ते लोकें बश्कार दूरी गी घटाना ऐ। इस रेडियो च सरकार दी स्कीमें बारै ते होंरनें जागरूकता कार्यक्रमें गी प्रसारित कीता जाहग। एहूदे अलावा इस रेडियो च होंर जरूरी जानकारी गी खास करियै दूर-दरेडे इलाकें च पजाया जाहग।

<><><><><><>

Weather

मौसम विभाग नै जम्मू कश्मीर च 26 मार्च थमां परतियै बरखा पौने दे असार दस्से दे न। मौसम बदलोखड़ा रौहने दे कन्नोकन्नी 28 मार्च तोड़ी कई थाहें पर हल्की थमां दरम्याने दर्जे दी बरखा पेई सकदी ऐ ते उच्चियें धारें पर बर्फबारी होई सकदी ऐ। विभाग नै 50 किलोमीटर फही घंटे तगर दे स्हाबै नै बिजली चमकने ते तेज ब्हाऽ चलने दी बी पेशगोई कीती दी ऐ जेदे करी विभाग नै इस समें दरान लोकें गी चकन्ने रौहने आस्तै आक्खे दा ऐ।

<><><><><><>